

## Foi polas nonas de outono

29 de maio de 2018

Foi polas nonas de Outono.  
Galicia, Valuria, Castro de Rei, Goberno!  
Escoitade o noso infortunio!  
Foi polas nonas do Outono,  
amigo, compañeiro,  
que non che sorprenda a luz  
porque fuches luz,  
que non che sorprenda a verba  
pois fuches verba,  
verba nosa, verba acaída,  
verba valura,  
“omnia verba”.  
Mago da ilusión e das palabras.  
Apertas fondas de todos,  
apertas grandes, medradas, apertas, grandes apertas  
... foi polas nonas de Outono.



Xosé Manuel,  
augusto Carballo dos nosos, de raíces fondas.  
Sopro de aire fresco que construíches a esperanza.  
Ferreiro batendo co mazo das palabras  
na bigornia do pensamento.  
Sócrates da ironía,  
loitador chispeante  
entre a sorna e a retranca,  
mestre dos axiomas envolventes,  
talento creador, demiúrgo máxico  
que invocas oracións do noso,  
rezos do noso con nós.  
Galego de denuncias e silencios,  
de verdades e encomendas,  
Xosé Manuel,  
Apertas fortes, apertas fondas, apertas.

Foi o 24 de Outono pola seca,  
e Galicia chorou,  
e viñeron as augas  
e abrollaron as herbas  
e verdeceu a campía da Valura verdeal,  
e con tanto choro e tanta dor  
encheron os ríos, abriron as fontes  
e viñeron os ventos,  
e a Galicia segue sotelando  
auga de lágrimas, vento de xemidos  
e saloucos fondos, cicloxénicos saloucos,  
explosivas elexías da falta.  
No nome do pai, do fillo e do espírito santo,  
fúchestenos polas nonas de Outono.  
Polas nonas de Outono, Xosé Manuel.

E quedamos baleiros,  
Orfos da túa lúa chea  
entre a "Noite dos lobos"  
co "Mal de moitos"  
e entrounos o frío  
e abrangueunos o silencio,  
mais Don Otto está aquí connosco  
e tamén os valuros,  
e os do castro de Viladonga,  
e os amigos da malla,  
e os amigos da feira,  
e os do Val de Francos, Irimia  
e outros tantos.  
Foi no nome do pai, do fillo e do espírito santo  
polas nonas de outono,  
mais nestas calendas de maio,  
nestas calendas . . .  
apertas fortes, abertas fondas de todos,  
Xosé Manuel.  
Apertas fondas.

(Poema de Xosé Otero Canto, lido no acto no que se deu o nome de Xosé Manuel Carballo, ao Centro Cultural de Castro de Rei).